

Inatsisartut aaliangiiffigisassaattut siunnersuut Naalakkersuisut peqquneqarnissaat Naalagaaffiup akisussaasuinut atassuteqartoqarnissaannik Kalaallit Nunaanni Pinerluttulerinermut inatsimmi paragraffinik ikkussisoqassasoq, nittartakkatigut atornerluinerup inatsisitigut unioqquitsinertut isigineqaarnissaanut. Atassuteqarneq UPA 2022 pinnginnerani pisimassaaq.

(Inatsisartunut ilaasortaq Anna Wagenheim, Demokraatit).

Akissuteqaat

(Ineqarnermut, Attaveqatigiinnermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq

Siullermeerneqarnera

Aalajangiiffigisassatut siunnersuummut pingaaruteqartumut Naalakkersuisut siunnersuuteqartumut qujapput.

Meerartatta innarlerneqarnissamut illersorneqarnissaat anguniarlugu sapinngisatsinnik iliuseqartariaqaratta Naalakkersuisut isumaqataaffigaat - aamma silarsuarmi digitaliusumi.

Meeqqap kinguaassiutitigut atornerlunneqarnissaa siunertarlugu, meeqqap inersimasumut tatiginninnerata ineriartornissaanut misileraaneq grooming-imi pineqarpoq. Digitalikkut grooming aamma tassaavoq meeqqap atisaqarani assiminik kinguaassiutinut tunngassuteqartumik nassitsinissaanut kaammattorneqarnera.

Pinerluttulerinermi inatsimmi pissutsit taamatut ittut eqqartuussivikkut malersorneqarnissaat arlalinnik periarfissaqarpoq. Kannguttaatsuliorneq pillugu, pinngitsaaliilluni iliuseqartitsiniarneq pillugu, unioqquitsilluni pinngitsaaliineq pillugu imaluunniit pinngitsaaliilluni atoqatiginninneq pillugu aalajangersakkat tassani periarfissaasinnaapput.

Taamaattoq digitalikkut grooming pillugu immikkut ittumik paragrafimik amigaateqarpugut, soorlu Sverigemi, Norgemi aamma Finlandimi taamatut ittumik peqartut.

Digitalikkut innarliisarnermut suliassaqarfimmi qallunaat pillaasarnermik inatsisaanni malittarisassat naammannersut pillugit misissuisoqarnissaa Danmarkimi politiit unnerluussisussaataasullu 2021-2023-mut aningaasaqarnerat pillugu isumaqatigiissutaanni isumaqatigiissutigineqarpoq. Misissuineq taanna 2021-p naanerani naammassisussatut naatsorsuutigineqartoq aamma suliaq Danmarkimi pillaasarnermik inatsimmik allanngortitsisoqassappat allanngortitsinissamut tunngavissiissasoq Justitsministereqarfimmit ilisimatitsissutigineqarpoq.

Kalaallit Nunaanni Pinerluttulerinermi inatsisip ullutsinnut naleqquttuunissaa Naalakkersuisunut pingaaruteqarmat, Pinerluttulerinermi inatsimmi grooming pillugu aalajangersakkamik ikkuseqqullugit Naalakkersuisut Justitsministereqarfimmut noqqaassuteqassapput.

Naalakkersuisut taamatut oqaaseqarlutik siunnersuutip akuerineqarnissaa inassutigaaq.